



Alla fiera da Sagogn han era ils affons giu lur stans e fatg bunas fatschentas.



Mmh, il pizzaiolo Giusep Beeli vegn strusch suenter da dar damogn als giavischs dils hospes.

FOTOS S. BEARTH

Sco ord il cudisch da praulas

Ils da Sagogn han envidau alla fiera dil vitg cun fiasta d'atun

DA SUSI BEARTH / ANR

■ **Temperaturas da stad, tschiel blau, la cuntrada che semida plaunet en colurs d'atun ed el quartier Casut amiez Sagogn in cunfar da fiera cun massa glied. Tut priu sa ins descriver la fiasta d'atun dalla sonda vargada a Sagogn sco ord il cudisch da praulas.** Per che tut gartegi han in tschuat persunas privatas ed uniuns segidau cull'Uniun da traffic Sagogn che ha organisau la 16avla fiera dil vitg. Quella ha adina liug la sonda avon il di da Rogaziun federala e sco nus havein schau dir ei la bialaura quasi garantida quei di. L'ustria vegn mintg'onn surschada ad in'uniun ed uonn ha il chorbaselgia catolic surviu ils hospes. Sco *Augustin Beeli*, il canzlist da Sagogn, ha relatau sin damonda dall'Agentura da novitads rumantscha ha ei giu igl entir di ina

pulita truscha da glied a Sagogn e hospes ed indigens han festivau da buna luna tochen tard. Allas 22.00 havevien las cantaduras ed ils cantadurs atgnamein previu da serrar l'ustria, mo damai ch'ella eri aunc fullanada seigi la fiasta ida vinavon tochen mesanort.

Legns, zetgas e vaccas

Sin rodund 13 stans han carschi ed affons fatg amogna lur rauba, legns, calenders e bia auter. La gruppa da Mupi che sa festivar uonn il giubileum da 30 onns ha animau ils visitaders da far in parcour cun velo ni cun auters utensils da semover. La Pega (Pleiv evangelica gruppa d'affons) ha envidau alla meisa da zambergiar ed atratg l'attenziun cun ina concurrenza da lignar friads. Special biala era la meisa dalle buobas *Norina* e *Pierina* che han vendiu zetgas da tutas colurs, fuormas e

grondezias. Ellas separticipeschan gia dapi tschun onns alla fiera dil vitg e vendan zetgas ch'ellas tilan sezzas en lur iert. Gronda fuola ha ei era dau avon il fuorn dil vitg. Il paun ei staus naven en in gienà ed ils pizzaiolos han giu da far gl'entir di. La Pro Sagogn haveva decorau siu stan cun puma caura e reparteva recepts per far mel, sirup ed autras bunas caussas ord quei bi fretg tgietschen. Cul «legn dallas vias» han ei fatg cuort'uriala e reclama per las novas tablas dil vitg e sco ei s'aida a fiera ha era la Pro Sagogn giu da vender entatzei – numnadamein in bellezia calender cun fotografias dil vitg pil 2010. In'attraziun che ha carmalau neutier d'abia publicum ei la scargada dall'Alp s. Martin stada e sco mintg'onn per quei di ha il hortulan *Gion Rudolf Caduff* aviert las seivs da sia plantera e da ses orts per dar investa als interessai.



Gion Rudolf Caduff (secund da dretg) ha envidau al gi dalle seivs aviertas sin sia plantera a Sagogn.

Sis dis bialaura il fevrer

Bien onn da gestiun per las Penticularas Sedrun

■ **(anr/gv) Igl unviern vargau ei l'aura stada tut auter che buna per las penticularas. Tuttina annunzia la Penticularas Sedrun SA in bien onn da fatschenta.** Quei onn ha entschiet il december cun frequenzas che han bunamein schau spigtar in onn da record. Las nevadas cuntinuontas il fevrer e mars han denton sminiu l'euforia e caschunau ina reduenziun massiva dallas entradas ton tiel transport dils skiunzs sco ella gastronomia. El total dallas frequenzas han las penticularas stuiu nudar ina digren da 6,3% sin 2,845 milliuns. Las entradas muntan 8,5 milliuns ed ein per 1,6 ni per 140 000 francs pli bassas ch'igl onn 2007/08. Il resultat tenor Ebita ei 2,675 milliuns, il cash flow 2,1 milliuns ed il gudogn schuber 63 415 francs. Dividenda datti tier la Penticularas Sedrun SA era uonn negina.

Bunas relaziuns per tuts

Ella sesiun 2007/08 havevan la Penticularas Sedrun SA respectiv l'Arena Gottard Alpsu aunc profitau dallas meins bunas relaziuns en ils auters loghens da skis. Quei ei uonn buca stau il cass e perquei seigi il resultat – ch'ei il tschunavel meglier resultat dapi l'existenza dall'interpresa – tonpli plascheivels, scriva l'interpresa cun *Peter Furger* alla testa dil cussegl d'administraziun e *Silvio Schmid* sco directur, el rapport annual gest

edius. Quei resultat muossi che la purschida correspundi al basegns dalla fiera.

La penticulara sil Tgom ei la purschida dallas penticularas la stad. Leu fan las penticularas in deficit da rodund 50 000 francs ad onn. «La Penticularas Sedrun SA taxescha quella purschida sco impurtonta contribuziun al turissem da stad», scrivon ils responsabels el rapport.

Neiv ed aunc inagada neiv

Las nevadas digl unviern vargau han fatg plascher e fastedis. Tochen ils 27 da mars havevi dau a Sedrun nov meters neiv. Il

medem di ha *Nina Levy* mesirau leu 116 cm neiv. Nevadas e stempraus han sfurzau da serrar ils indrezs a Val Val ed Alpsu durtont 14 dis per motivs da segirtad e dils 13 tochen ils 16 d'avrel ha Val Val che fuorma la comunicaziun cuagl Alpsu stuiu serrar gia allas 13.00 per prighel da lavina – quei da bellezia aura. Cun dapli neiv sur-engiu han ils manischunzs stuiu far dapli pista, mo persuerter han ils indrezs d'enevar artificialmeinduvrau mo la mesadad dalla'aua duvrada la sesiun 2006/07. Quei munta ina reduenziun dils cuosts da forza electrica ed aua da rodund 20%.

Comunicaziun cun Andermatt

El rapport sefatschentan il cussegl d'administraziun ed il directur era cuagl avegnir dall'interpresa. Quei avegnir ei focussaus en direcziun Ursera e la colligiazion dils territoris da skis. Culla realisaziun dil resort da vacanzas ad Ursera creschi il basegns da parcadis. El stan actual drovi ad Ursera 1300 tochen 1400 parcadis temporars. Igl unviern proxim seigien quels aunc garanti, mo pigl avegnir seigi aunc buca pusseivel da planisar.



La Penticularas Sedrun SA annunzia malgrad las relaziuns meins bunas il tschunavel meglier resultat da fatschenta.

MAD

■ VUORZ

Ils calabres ella biblioteca populara

(cp) Sut il tetel «Ils calabres» expone *Nara Pfister* dessegns dad ossa ella Biblioteca populara Vuorz. Ossa che l'artista ha anflau alla riva dalla mar ell'Italia. Las fuormas designadas envidan ils aspectadurs da sezs formar in tgiert tenor lur atgna imaginaziun contemplativa. Per l'artista ein entginas dallas figuras vivas. In fatg che munta per detg agens, setracta ei atgnamein da material e dad objects morts. En ina moda e maniera nunusitada ei Nara Pfister se spruada da dar nova veta al material. Nara Pfister ei naschida 1981 a Basilea. Ella ha frequentau la scola d'art en siu marcau nativ. Da medem temps ha ella acquistau la maturitad professionala. Vinavon ei l'artisa seprofundada en differentas tecnicas da squitschar. Nara Pfister viva dapi igl onn 2003 a Turigt ed ei gia separticipada a differentas occurrenzas ed exposiziuns en Svizra ed egl'exteriur. Denter auter ha ella gia exponiu alla staziun da Sumvitg. Per l'emprema ga presenta ella in schatg da sias ovras el vitg nativ da siu bab. La Biblioteca populara envida alla vernissascha dad «Ils calabres» gievgia, ils 24 da settember 2009 allas 19.00 els stabiliments dalla biblioteca a Vuorz.

L'exposiziun ei aviarta mintgamai la gievgia sera dallas 19.00 entochen allas 20.00 ni sin damonda via tel. 081 936 22 00.